

下

元史節要

忠



死送葬

義宗

聖皇

石 頡德八刺仁宗嫡子也母莊懿慈

吉刺氏以大德七年二月甲子生帝延

祐三年十二月立為皇太子開府置僚屬六年十

月受玉冊命百司庶務必先啓太子然後奏聞七

年春仁宗不豫帝憂形于色每夜焚香泣告于天

請以身代仁宗崩哀毀過禮素服寢于地日歔一

粥太后命以太子太師鐵木迭兒為右丞相鐵木

迭兒以前御史中丞楊朵兒只中書平章蕭拜住

違太后旨矯命殺之並籍其家徽政院使失列門

以太后命請更朝官帝曰此豈除官時邪且先帝
舊臣豈宜輕任侯子即位議于宗親元老賢者任
之邪者黜之可也叅議中書省事乞失監坐鬻官
刑部以法當杖太后命答之帝曰不可法者天下
之公徇私而輕重之非示天下以公也卒正其罪
司農卿完者不花言先帝以土田頒賜諸臣者宜
悉歸之官帝問所賜為誰對曰左丞相阿散所得
為多帝曰我常諭卿等當以公心輔弼卿於先朝
嘗請海舶之稅以阿散奏而止今卿所言乃復私
憾耳非公議也豈輔弼之道邪三月庚寅帝即位

尊太后為太皇太后鐵木迭兒進開府儀同三司
上柱國太師敕群臣超授散官者毋越班次
夏四月庚戌有事于太廟告即位車駕幸上都議
祔仁宗以陰陽拘忌權結綠殿於太室東南以奉
神主有獻七寶帶者因近臣以進帝曰朕登大
位不聞卿薦賢才而為人進帶是以利誘朕也其
還之上都留守賀伯顏坐便服迎詔棄市籍其
家秋八月祔仁宗聖文欽孝皇帝莊懿慈聖皇
后于太廟鐵木迭兒攝太尉奉玉冊行事鐵木迭
兒以四川行省平章趙世延嘗劾其姦誣以不敬

下獄請殺之不允帝幸涼亭後容謂近侍曰頃鐵木迭兒必欲宜趙世延于死地朕素聞其忠良故每奏不納左右皆稱萬歲冬十月車駕還大都詔太常院臣曰朕將以四時躬祀太室宜與群臣集議其禮此追遠報本之道毋以朕勞於對越而有所損其悉遵典禮行之十一月丙子朔帝御齋宮丁丑恭謝太廟至仁宗太室即流涕左右感動以登極犬賚諸王百官中書會其數計金五十兩銀七十八萬兩鈔百二十一萬一千貫幣五萬七千三百六十四匹帛四萬九千三百二十二匹木綿

九萬二千六百七十二匹布二萬三千三百九十八匹衣八百五十九襲鞍勒弓矢有差造今年鈔本至元鈔五千萬貫中統鈔二百五十萬貫 敕翰林國史院纂脩仁宗實錄 詔各郡建帝師八思巴殿其制視孔子廟有加太常禮儀院擬進時享太廟儀式 十二月乙巳朔詔改明年為至治元年減天下租賦二分包銀五分 翰林學士忽都魯兒譯進宋儒真德秀大學衍義帝曰脩身治國無踰此書賜鈔五萬貫 河南餓帝問其故群臣莫對帝曰良由朕治道未治鄉等又不盡心乃

職委任非人致陰陽失和災害荐至自今各務勤恪以應天心毋使吾民重困可也。平章政事拜住進鹵簿圖帝以唐制用萬二千三百人太多乃定大駕為三千二百人法駕為二千五百人。帝聞賀伯顏母老閔之以所籍京兆田磴還其家。至治元年辛酉春正月丙戌帝服袞冕享太廟禮畢謂群臣曰一歲惟四祀使人代之不能致如在之誠實所未安歲必親祀終朕之身廷臣或言祀事畢宜赦天下帝曰息可常施赦不可屢下使殺人獲免則死者何辜遂命中書陳便宜行之。

帝欲以元夕張燈宮中叅議中書省事張養浩上書諫帝大怒既而曰非張希孟不敢言即命罷之賜養浩金織幣一帛一以旌其直。殺監察御史觀音保鎖咬兒哈的迷失竄成珪李謙亨於奴兒干以其諫造壽安山佛寺也。三月庚辰廷試進士大普花宋本等六十四人賜及第出身有差。駕幸上都。六月朔日食秋七月蓋屋僧圓明作亂遣樞密院判官章台督兵捕之郟陽道士劉志先以妖術謀亂復命章台捕之八月車駕駐蹕興和左右以寒甚請還京師帝曰兵以牛馬為重民

以稼穡為本朕遲留者欲使馬得芻牧民得刈獲
一舉兩得何計乎寒九月還大都 冬十月妖
僧圓明等伏誅敕翰林集賢院官年七十者毋致
仕 戊寅御大明殿群臣上尊號曰繼天體道
敬文仁武大昭孝皇帝十二月辛丑立皇后亦啓
列氏

二年壬戌春三月駕幸柳林駙馬許訥之子速怯
訖曰臣父諫叛臣母私從人帝曰人子事親有隱
無犯今有過不諫乃復告訖命誅之 夏四月駕
幸上都五月幸五臺山以吳全節為玄教 太宗

師特進上卿 閏月封諸葛忠武侯為威烈忠武

顯靈 仁濟王 六月丁卯朔車駕至五臺山秋

七月戊午次應州辛酉次渾源州八月甲戌次奉
聖州九月丙辰太皇太后弘吉剌氏崩初仁宗議
立太子太后見明宗有英氣而帝稍柔懦諸群小
以立明宗必不利於己遂擁立帝及帝既即位太
後來賀見帝有毅然之色太后退而悔曰我不擬養
此兒邪遂鬱鬱成疾而崩先是有告嶺北行省平
章阿散中書平章黑驢及御史大夫脫忒哈微政
使失列門與故要束木妻亦列失八謀廢立者左

丞相拜任請鞠之帝曰彼若借太皇太后為詞奈何遂不問而悉誅之籍其家冬十月太史院請禁明年興作土功從之 以拜任為右丞相十一月朔日食御史李端言近者京師地震日月薄蝕皆臣下失職所致帝自責曰是朕之過也因敕群臣亦當修飭以謹天戒端又言朝廷雖設起居注所錄皆臣下聞奏事因上之言動宜悉書之以付史館世祖以來定制度宜著為令使吏不得為姦治獄者有所遵守從之 平江路水損官民田四萬九千六百餘頃免其租南康建昌大水山崩死者

四十七人命賑之十二月西僧灌頂疾請釋囚帝曰釋囚祈福豈為師惜朕思惡人屢赦反害善良何福之有 宣政院臣言世祖時晃吉刺歲輸尚食羊二千成宗時增為三千今請增五千帝不許曰天下民皆朕民如有不足朕當濟之若加重賦百姓必致困窮國亦何益命遵世祖初制

三年癸亥春正月右丞相拜任言前集賢侍講學士趙居信直學士吳澄皆有德老儒請徵用之帝曰卿言適副朕意更當搜訪山林隱逸之士遂以居信為翰林丞旨澄為學士二月丙寅翰林國史

院進仁宗實錄 癸酉帝畋于柳林謂拜住曰近者地道失寧風雨不時豈朕纂承大寶行事有關歟對曰地震自古有之陛下自責固宜良由臣等夫職不能燮理帝曰朕在位三載於兆姓萬物豈無乖戾之事卿等宜與百官議有便民利物者朕即行之 四川平章趙世延為其弟訟不法事繫獄待對其弟逃去詔出之仍命自今逃者百日不出則釋待對者著為令 格例成定凡二千五百三十九條內斷例七百一十七條格千一百五十一詔赦九十四令類五百七十七名曰大元通制

頒行天下

三月駕幸上都

祔太皇太后于順

宗廟室上尊謚曰昭獻元聖皇后

以圓明王道

明之亂禁僧道度牒符籙赦醫卜匠官居喪不得去職七十不聽致仕子孫無陰叙能紹其業者量才錄用詔行助後法遣使考視稅籍高下出田若干畝使應後之人更掌之收其歲入以助後費官不得與 五月庚子大風雨雹拔林行宮內外大木二千七百章 帝御大安閣見太祖世祖遺衣皆以縑素木綿為之重加補綴嗟嘆良久謂侍臣曰祖宗創業艱難服用節儉乃如此朕焉敢頃刻

忘之。先是諸王怯伯斃寇邊，至是遣使來降。帝曰：朕非欲彼土地人民，但吾民不罹邊患，軍士免於勞役，斯幸矣。今既來降，當厚其賜以安之。秋七月，御史臺請開言路。帝曰：言路何嘗不開，但卿等選人未當耳。八月癸亥，帝自上都還，駐蹕南坡。是夕，御史大夫鉄失及其弟宣徽使鎖南典瑞院使脫火赤知樞密院事也，失帖木兒副使阿散、僉書章台、大司農先禿兒前平章赤斤鉄木兒前雲南平章完者前治書侍御史唆南衛士禿滿及諸王按梯不花等謀逆，以鉄失所領阿剌衛兵為外

應。鉄失赤斤鉄木兒殺丞相拜住，遂弒帝于行幄。年二十一，在位四年。從葬諸帝陵。後謚曰睿聖文孝皇帝，廟號英宗。國語曰格堅皇帝。帝性剛明，嘗戒群臣曰：卿等居高位，食厚祿，當勉力圖報。苟或貧乏，朕不惜賜汝。若為不法，則必刑無赦。又嘗諭拜住曰：朕以幼冲嗣承大業，錦衣玉食，何求不得。惟我祖宗擲風沐雨以定天下，曾有此樂否？卿元勲之裔，當體朕至懷。毋忝爾祖。拜住頓首對曰：創業惟艱，守成不易。陛下之言及此，億兆之福也。八思吉思以罪下獄。帝謂左右曰：法者祖宗所制，非

朕所得私心思吉思事朕日久今其有罪當論如法其明斷如此然以果於誅戮奸黨畏罪遂構大變云皇叔嗣晉王立是為泰定皇帝

泰定皇帝名也孫帖木兒顯宗甘麻刺之長子裕宗之嫡孫也初世祖以第四子那木罕為北安王鎮北邊王薨顯宗以長孫封晉王代之至元十三年十月二十九日帝生於晉邸大德六年晉王薨帝襲爵是為嗣晉王仍鎮北邊成宗武宗仁宗之立咸與翼戴之謀有盟書焉王府內史倒刺沙得幸於帝常傾伺朝廷事機遣其子哈散事丞相拜住

知御史大夫鐵失與拜住意不協欲傾害之至治三年三月宣徽使探忒來王邸與倒刺沙言主上將不容於晉王汝蓋思之於是倒刺沙與探忒深相要結八月晉王獵於秃刺之地鐵失密遣幹羅思來言曰我與哈散也先帖木兒失秃兒等謀已定事成惟立王為皇帝王命囚之遣別列迷失赴上都以逆謀告未至鐵失等弒英宗諸王按梯不花及也先帖木兒奉皇帝璽綬迎帝于鎮所九月癸巳即皇帝位于龍居河大赦天下十月甲子遣使至大都以即位告天地宗廟社稷誅逆賊也先

帖木兒完者鎖南禿滿等於行在所又遣右丞相
旭邁傑御史大夫細澤誅鐵失失禿兒赤斤鐵木
兒脫大赤等於大都並戮其子孫籍入家產 十
一月己丑車駕次于中都辛丑至大都丁未御大
明殿受諸王百官朝賀癸丑遣使至曲阜以太牢
祀孔子御史言曩者鐵木迭兒專政誣殺楊朶兒
只蕭拜住賀伯顏觀音保鎖咬兒哈的迷失枉竄
李謙亨成珪罷免王毅高昉張志弼天下咸知其
寃請昭雪之詔存者召還錄用死者贈官有差十
二月戊辰追謚皇考晉王曰光聖仁孝皇帝廟號

顯宗皇妣晉王妃曰宣懿淑聖皇后庚午盜入太
廟竊仁宗及莊懿慈聖皇后金主壬申作仁宗主
仍督有司捕盜 太常院臣言世祖以來太廟歲
惟一享先帝始復古制一歲四祭請裁擇之帝曰
祭祀重事也朕何敢簡其禮命仍四祭 監察御
史脫脫等言鐵木迭兒在先朝包藏禍心離間親
藩誅戮大臣使先帝孤立卒罹大禍其子唆南親
與逆謀父違天憲乞正其罪以快元元之心遂誅
唆南及其黨月魯禿禿哈速敦等流諸王月魯鐵
木兒於雲南按梯不花於海南曲呂不花於奴兒

于李羅及兀魯思不花于海島並坐與鐵失逆謀也。丁亥下詔曰朕荷天洪禧嗣大應服側躬圖治夙夜祇懼惟祖訓是遵乃開歲甲子景運伊始思與天下更新稽諸典禮逾年改元可以明年為泰定元年。泰定元年甲子春正月辛丑諸王大臣請立皇太子。召親王圖帖睦爾于瓊州阿木哥于大同。賜故監察御史觀音保鎖咬兒哈的迷失妻子鈔各千錠。二月江浙行省左丞趙簡請開經筵及擇師傅令太子及諸王大臣子孫受學。遂命平章政事張珪翰林承旨忽都魯都兒迷

失學士吳澄集賢直學士鄧文原以帝範資治通鑑大學衍義貞觀政要等書進講復敕右丞相也先鐵木兒領之。三月戊戌廷試進士賜八剌張益等八十四人及第出身有差會試下第人亦賜教官有差丙午冊皇后八八罕氏立皇子阿剌吉八為皇太子己酉以皇子八的麻亦兒間卜嗣封晉王。監察御史宋本李嘉賓傳起岩言太尉司徒司空三公之職濫設僧人及會福殊祥二院並辱名爵請罷之不報。夏四月駕幸上都帝諭倒剌沙曰朕即位以來無一人執成法為朕言者知而

不言則不忠且陷人於罪繼自今凡有所知宜悉以聞又曰凡事防之於小則易救之於大則難爾其以朕言明告于衆俾知所慎太廟新殿成五月遷列聖神主于新殿六月張珪自大都至以守臣集議事言逆黨未討奸惡未除忠憤未雪冤枉未理政令不信賞罰不公賦後不均財用不節請裁擇之不報癸酉帝受佛法於帝師詔䟽決繫囚存恤軍士遠仕瘴地身死不得歸葬妻子流落者有司資給遣還仍着為令秋七月中書省臣言東宮衛士先朝止三千人今增至萬七千請命

詹事院汰去仍依舊制從之八月駕還大都秦州成紀縣大雨山崩水溢壅土至來釜河成丘阜冬十月封親王圖帖睦爾為懷王食邑瑞州六萬五千戶十一月印明年鈔本至元鈔四十萬錠中統鈔十萬錠十二月命翰林國史院脩英宗顯宗實錄

二年乙丑春正月以畿甸不登罷春畋禁后妃諸王駙馬毋通星術之士非司天臺官不得妄言禍福中書省臣言江南民貧僧富諸寺觀田土非宋舊置并累朝所賜者請仍舊制與民均後從

之 辛丑懷王圖帖睦爾出居于建康 山東廉
訪使許思敬請頒族葬制禁用陰陽相地邪說三
月祭先農 頒道經于天下名山宮觀 三月駕
幸上都夏五月旭邁傑等以國用不足請減廐馬
汰衛士及節諸王濫賜從之 置諫議書院於昌
平祀唐劉蕡 六月己卯朔皇子生命巫祓除于
宮 中書叅政左塔不台言大臣兼領軍務前古
所無鉄失以御史大夫也先鉄木兒以知樞密院
事皆領衛兵如虎而翼故成逆謀自今軍衛之職
乞勿以大臣領之庶勲舊之家得以保全從之仍

賜幣帛以旌其直 息州民趙丑斬郭菩薩妖言
彌勒佛當有天下有司以聞命宗正府刑部樞密
院御史臺及河南行省官雜鞠之秋七月紐澤許
思敬編類帝訓成請於經筵進講仍俾皇太子觀
覽有旨譯其書以進申禁漢人箠執兵仗有軍籍
者征行給之還復歸于官 九月分天下為十八
道遣使宣撫按問官吏不法詢民疾苦審理冤滯
凡可以興利除害從宜舉行有罪者四品以上停
職申請五品以下就便處決其有政績尤異暨晦
跡丘園才堪輔治者其以名聞 以郡縣饑詔運

粟十五萬石貯瀕河諸倉以備賑救仍敕有司治
義倉募富民入粟拜官二千石從七品千石正八
品五百石從八品三百石正九品不願仕者旌其
門己酉海運江南糧百七十萬石至京師 駕還
大都禁飢民結扁擔社傷人者杖一百著為令冬
十月皇后赤憐真八刺受佛戒於帝師郭菩薩等
伏誅杖流其黨十二月鎮南王脫不花卒以中書
平章乃馬可攝鎮其地

三年丙寅春正月徵前翰林學士吳澄不起封諸
王寬徹不花為威順王鎮湖廣買奴為宣靖王鎮

益都 二月駕幸上都命諸王也忒古不花及中
書省臣兀伯都刺善僧許思敬朶朶居守 二月

乙巳朔帝以不雨自責命審決獄囚遣使分祀五

嶽四瀆名山大川及京城宮觀 敕百官集議急

務中書省臣請汰衛士節濫賞罷營繕防徭寇諸
寺官署坑冶等事歸中書並從之翰林承旨阿憐
帖木兒等譯帝訓成更名曰皇圖大訓敕受皇太
子 秋七月命翰林侍講學士阿魯威等譯世祖
聖訓以備經筵進講八月中書平章兀伯都刺左
丞許思敬並以災變饑歉乞解政柄不允鹽官州

大風海溢壞隄三十餘里遣使祭海神不止徙居
民千二百五十家 九月駕至大都 冬十月賜
大夫源筵聖寺鈔二萬錠田千頃中書省臣言養
給軍民必藉地利世祖建宣文弘教寺賜永業當
時已號虛費而成宗復構天壽萬寧寺較之世祖
用增倍半若武宗之崇息福元仁宗之承華普慶
租榷所入益又甚焉英宗鑿山開寺損兵傷農而
卒無益夫土地祖宗所有子孫當共惜之臣恐茲
後藉為口實妄興工役徼福利以逞利欲惟陛下
察之帝嘉納 御史言比年營繕以衛軍供役廢

武事不講請遵世祖舊制教習五衛親軍以備扈
從不報

四年丁卯春正月御史辛鈞言西商鬻寶動以數
十萬錠今水旱民貧請節其費不報皇子允丹歲
卜受佛戒于智泉寺二月進襲封衍聖公孔思晦
階嘉議大夫 三月以皇子允丹歲卜出鎮北邊
丙午廷試進士阿察赤李黼等八十五人賜進
士及第出身有差駕幸上都夏四月辛未盜入太
廟竊武宗金主及祭器壬申作武宗主以典守宗
廟不嚴罷太常禮儀院官 高州徭寇電白縣千

戶張恒力戰死之邑人為之立祠敕賜額曰旌義
秋七月建橫渠書院於郿縣祠宋儒張載八月津
沱河溢發丁浚治濟河以殺其勢 謚武宗后曰
宣慈惠聖英宗后曰莊靜懿聖升祔太廟九月朔
日食 敕國子監仍舊制歲貢生負業成者六人
禁僧道買民田違者坐罪沒其籍 御史言廣海
右流放之地請以職官贓污者處之以示懲戒從
之 閏月駕還大都以災變赦天下 甲戌命祀
天地享大廟致祭五岳四瀆名山大川 十二月
乙卯蔡國公張珪卒

致和元年戊辰春正月詔諭百司凡不赴任及擅
離職者奪其官避差遣者笞之 頒農桑舊制十
四條于天下仍詔勵有司以察勤惰帝將畋柳林
御史王獻等以歲饑諫帝曰其禁衛士毋擾民家
命御史二人巡察之二月庚申詔天下改元致和
免被災州郡稅糧一年流民復業者差稅三年疑獄
繫三年不決者咸釋之 三月乙卯帝御興聖殿
受無量壽佛戒于帝師 戊子駕幸上都以趙世
延知經筵事趙簡預經筵事阿魯威同知經筵事
曹元用吳秉道虞集改輔馬祖常李术魯中羽等並

兼經筵官封唐柳州刺史柳宗元曰文惠昭靈公
七月庚午帝崩在位五年壽三十六周王立是
為明宗皇帝明宗皇帝名和世瓌武宗長子也母
曰仁獻 聖皇后亦乞列氏成宗大德三年命武
宗撫軍北邊帝以四年十一月壬子生十一年成
宗崩武宗入繼大統立仁宗為皇太子命以次傳
於帝武宗崩仁宗立議建儲時丞相鐵木迭兒欲
固位取寵乃議立英宗為皇太子又與太后幸臣
失烈門譖帝於兩宮浸潤既行於是封帝為周王
出鎮雲南置官屬遣就鎮延祐七年仁宗崩英宗

嗣立至治三年八月御史大夫鐵失弒英宗晉王
也孫鐵木兒立為皇帝改元泰定封帝弟圖帖睦
爾為懷王出居建康致和元年七月泰定帝崩于
上都倒刺沙專權自用踰月不立君朝野疑懼時
僉樞密院事燕鐵木兒留守京師遂謀舉義號於
衆曰武皇有聖子二人孝友仁文天下歸心大統
所在當迎立之不從者斬時帝方遠在沙漠猝未
能至乃遣人迎帝弟懷王于江陵且宣言已遣使
北迎帝以安衆心復稱帝所遣使者自北方來云
周王從諸王兵旦夕即至矣丁巳懷王入京師群

臣勸進王曰大兄在北以長以德當正大位必不
得已當明以朕志播告中外九月壬申懷王即位
是為文宗改元天曆說天下曰謹俟大兄之至以
遂固讓之心時倒刺沙在上都立泰定帝子為皇
帝乃遣兵犯大都而梁王王禪右丞相答失帖木
兒等皆將兵次于榆林燕鐵木兒帥師與戰屢敗
之榆林兵皆潰十月齊王月魯帖木兒元帥不花
帖木兒以兵圍上都倒刺沙乃奉皇帝寶出降兩
京道路始通於是文宗遣哈敦及撒迪等相繼來
迎朔漠諸王皆勸帝南還遂發北邊諸王察阿台

元帥朶列捏等咸帥師扈行舊臣孛羅尚家奴哈
八兒禿皆從至金山嶺北乃命孛羅如京師兩京
之民間帝使者至歡呼鼓舞曰吾天子實自北來矣
諸王舊臣爭先迎謁所至成聚天曆二年正月乙
丑文宗復遣中書左丞躍里帖木兒來迎乙酉撒
迪書至入見帝于行幄以文宗命勸進丙戌帝即
位于和寧之北遣撒迪還京師帝命之曰朕弟
曩常覽觀書史邇者得無廢乎聽政之暇宜親賢
士大夫講論史籍以知古今治亂得失卿等至京
師當以朕意諭之二月文宗立奎章閣學士院于

京師遣人以除目來奏帝並從之辛酉文宗遣右丞相燕鐵木兒奉皇帝瑤來上四月癸巳燕鐵木兒見帝於行宮率百官上皇帝瑤帝嘉其功拜大師仍命為中書右丞相開府儀同三司上柱國錄軍國重事監脩國史答剌罕太平王並如故復諭之曰凡京師百官朕弟所用者並仍其舊卿等其以朕意諭之燕帖木兒奏陛下君臨萬方國家大事所繫者中書省樞密院御史臺而已宜擇正人居之帝然之以武宗舊人哈八兒秃為中書平章政事前中書平章伯帖木兒知樞密院事常侍

孛羅為御史大夫是日帝宴諸王大臣于行殿特命臺臣曰太祖常敕臣下云美色名馬人皆悅之然万中一有繫累即能壞名敗德卿等居風紀之首亦嘗念及此乎世祖初立御史臺首命塔察兒棄帖傑兒二人協同其政天下國家驛由一人之身中書則右手也樞密則左手也左右手有病治之以良醫省院闕失不以御史臺治之可乎凡諸王有司違法越禮一聽舉覈風紀重則貪墨懼猶斧斤重則入木深其勢然也朕有關失卿亦以聞不爾責也辛丑文宗立都督府于大都遣使來奏

又以臺憲官除自來上並從之癸卯遣使如大都
卜日命中書左丞相鐵木兒補化攝告即位于郊
廟社稷遣武寧王徹徹禿及平章哈八兒禿立文
宗為皇太子仍立詹事院罷諸慶司乙巳監察御
史言嶺北行省控制一方廣輪萬里實太祖開基
之地國家根本繫焉方面之寄豈可輕任平章塔
即吉素非勲舊奴事倒刺沙起宿衛而至平章年
已七十眊昏尤甚右丞馬謀本晉邸部民以女妻
倒刺沙遂除左丞即中羅里市井小人禿魯思乃
晉邸衛卒不諳政務並宜黜退臺臣以聞帝曰御

史言甚當其並黜之又諭臺臣曰御史言嶺北省
臣朕甚嘉之繼今所常言者毋有所憚庚子命燕
鐵木兒選用嶺北行省官吏辛亥詔諭中書省臣
凡國家錢穀銓選大事先啓皇太子然後以聞鐵
木兒補化以父早啓皇太子辭相位乞更選賢德
委以燮理皇太子遣使以聞帝諭侍臣曰脩德應
天乃君臣當為之事鐵木兒補化所言良是天明
可畏朕未嘗斯須忘于懷也皇太子來會當共圖
其澤民利物者行之七月丙辰朔日食監察御史
把的干思言朝廷自去秋命將出師戡定禍亂其

供給軍需賞賚將士所費不可勝紀若以歲入經賦較之則其所過已過數倍况今諸王朝會舊制一切供億俱尚未給而陝西等處饑饉荐臻餓殍枕籍加以冬春之交雪雨愆期麥苗擣死秋田未種民庶遑遑流移者衆臣伏思之此正國家節用之時也如果有功必當賞賚者宜視其官崇卑而輕重之不惟省費亦可示勸其近侍諸臣奏請恩賜宜悉停罷以紓民力帝嘉納之仍敕中書省以其所言示百司八月乙酉朔帝次于王忽察都之地丙子皇太子入見是日宴皇太子及諸王大臣

于行殿唐寅帝暴崩年三十葬起輦谷皇太子復即位是為文宗皇帝

文宗皇帝名圖帖睦爾武宗之次子明宗之弟也母曰文獻昭聖皇后唐兀氏大德三年武宗總兵北邊帝以八年正月癸亥生十一年武宗入繼大統至大四年武宗崩傳位于弟仁宗延祐三年丞相鐵木迭兒等議立英宗為皇太子明宗以武宗長子乃出之居于沙漠及英宗即位鐵木迭兒復為丞相懷私固寵構釁骨肉諸王大臣莫不自危中政使咬住告脫歡察兒等交通親王於是出帝

居于海南至治三年六月英宗在上都謂丞相拜
住曰朕兄弟本無間隙曩以小人譖愬俾居遠方
當亟召還明正小人離間之罪未幾鐵失也先帖
木兒等為逆而晉王立為皇帝自瓊州召帝北還
至潭州復命止之後數月乃至京師封懷王次年
又命出居建康之殊祥院使也先捏掌其衛士初
晉王既為皇帝以內史倒刺沙為中書平章政事
遂為丞相狡復自用災異數見而帝兄弟播越南
北人心思之致和元年春大駕出畋柳林以疾還
宮諸王滿秃阿馬刺台宗正禮魯忽亦闊闊出等

與僉樞院使燕鐵木兒謀曰今主上之疾日臻將
往上都如有不諱吾黨扈從者報諸王大臣殺之
居大都者即縛省臺官宣言太子已至正位宸傳極
檄守禦諸閹則大事濟矣三月駕幸上都滿秃闊
闊出等扈從西安王阿刺忒納失理居守燕鐵木
兒亦留大都時也先捏私至上都與倒刺沙謀弗
利於帝乃遣人遷帝居江陵七月庚午泰定帝崩
于上都倒刺沙及梁王王禪遼王脫脫因結黨害
正人皆不平燕鐵木兒謀於西安王陰結勇士以
圖舉義八月甲午黎明百官集於興慶宮燕帖木



P23

兒率阿剌帖木兒孛倫赤等兵皆露刃手縛平章
烏伯都剌伯顏察兒分命勇士執左丞朶朶參政
王士熙侍御史鐵木兒脫歡等皆下之獄召百官
入內聽命即遣使馳驛迎帝於江陵密以意諭河
南平章伯顏令簡兵以備扈從徵諸衛兵屯京師
出府庫犒軍士調兵守禦關要又遣撒里不花等
往迎帝甲辰帝發江陵庚戌至汴梁伯顏等以兵
扈從北行阿速衛指揮使脫脫木兒帥其軍自上
都來歸即命守古北口壬子上都諸王及用事臣
以兵分道犯京畿脫脫木兒帥兵與戰于宜興臨

陣斬其詹事欽察禽平章乃馬台送京師戮之諸
王失刺敗走丙辰燕鐵木兒奉法駕郊迎丁巳帝
至京師入居大內己未梁王王禪丞相塔失鐵木
兒太尉不花平章買閭御史大夫紐澤等以上都
兵次榆林燕鐵木兒督師居庸關遣其弟撒敦以
兵襲上都兵于榆林大敗之追至懷來而還上都
諸王也先帖木兒平章禿滿迭兒自遼東以兵入
遷民鎮殺掠吏民九月丁卯燕鐵木兒率諸王大
臣伏闕請早正大位以安天下帝固辭曰大兄在朔方
吾敢紊天序乎燕鐵木兒曰人心向背之機間不

容髮一或失之噬躋無及帝曰必不得已當明著朕意以示天下而後可庚午上都諸王忽剌台引兵犯崞州卒未誅烏伯都剌鐵木哥流朶朶王士熙伯顏察兒脫歡等于遠州壬申帝即位於大明殿詔曰洪惟我太祖皇帝混一海宇爰立定制以一統緒宗親各受分地勿敢妄生覬覦以不易之成規萬世所共守者也世祖之後成宗武宗仁宗英宗以次相傳宗王貴戚咸遵祖訓至於晉邸具有盟書願守藩服而與賊臣鐵失也先帖木兒等潛通陰謀冒干寶位使英宗不幸罹於大故朕兄

弟播越南北備歷艱險臨御之事豈獲與聞朕以叔父之故順承惟謹于今六年災異迭見權臣倒刺沙烏伯都剌等專權自用變亂祖宗法度大行上賓利於立幼顯握國柄用成其奸宗王大臣以宗社之重統緒之正協謀推戴屬於眇躬朕以菲德宜俟大兄固讓再三宗戚將相百僚耆老以為神器不可以久虛天下不可以無主周王遼隔朔漠民庶遑已及三月誠懇迫切朕姑從其請謹俟大兄之至以遂朕固讓之心已於致和元年九月十三日即皇位於大明殿其以致和元年為大

曆元年可大赦天下癸酉封燕鐵木兒為太平王以太平路為食邑乙亥上都王禪兵襲破居庸關將士皆潰燕鐵木兒軍次三河丙子王禪遊兵至大口燕鐵木兒還軍次榆河與王禪前軍戰敗之追奔之至紅橋北其樞密副使阿剌帖木兒指揮使忽都帖木兒以兵會王禪復來戰又敗之師進據紅橋復戰于白浮之野燕鐵木兒手刃數人于陣敗之壬午大霧王禪等遁崑山州收集散亡復來戰我師陳于白浮之西敵不敢犯至夜撒敦脫脫木兒前後夾攻敗走之追及于昌平北斬首數

千級降萬餘人帝遣使賜燕鐵木兒上罇諭旨曰丞相每臨陣躬冒矢石脫有不虞奈何自今第以大將旗鼓督戰可也對曰凡戰臣必以身先之敢後者論以軍法若委之諸將萬一失利悔將何及甲申王禪單騎亡撒敦追之不及乙酉上都兵入古北口其知樞密院事竹溫台以兵掠石槽燕鐵木兒先遣撒敦倍道趣石槽掩其不備擊之燕鐵木兒以大軍繼至轉戰四十餘里至朱頭山擒駙馬孛羅帖木兒平章蒙古答失塔失帖木兒等送關下戮之將校降者萬人餘兵奔竄夜遣撒敦出

古北口逐之脫脫木兒與遼東軍戰薊州南殺獲無算丁亥遼東軍抵京師城燕鐵木兒引兵拒之令京城里長召募丁壯與兵士為伍乘城守禦戊子上都諸王忽剌合等兵入紫荆關將士皆潰陝西行臺御史大夫也先帖木兒引兵從大慶關渡河殺河中府官萬戶做里帖木兒軍潰而遁河東廉訪使萬家閻言徹里帖木兒身為大將紀律不嚴望風奔潰宜加重罰以言勸懲不報河東聞也先帖木兒軍至官吏皆棄城走也先帖木兒悉以其黨代之冬十月己丑燕鐵木兒引兵至通州擊

遼東軍敗之皆渡潞水走去脫脫木兒將兵四千西接紫荆關癸巳忽剌台遊兵進逼南城燕鐵木兒及陽翟王太平國王朶羅台等戰于檀子山之棗林殺太平死者蔽野餘衆宵遁脫脫木兒章吉與也先捏合擊敵軍於良鄉南轉戰至瀘溝橋忽剌台被創據橋而宿乙未燕鐵木兒帥軍循北山西趨良鄉時諸將與忽剌台阿剌帖木兒等戰于瀘溝橋聲言大軍至敵兵皆遁中書省臣言上都諸王大臣不思祖宗成憲惑於倒剌沙之言輒以兵犯京畿賴陛下洪福王禪遂致潰亡生擒諸王

李羅帖木兒及諸用事臣蒙古答失塔失帖木兒等既已明正典刑宜傳首四方以示衆從之戊戌諸將進阿剌帖木兒至紫荆關獲之送京師斬之秃滿迭兒復入古北口燕鐵木兒引兵禦之大戰于檀州南敗之其萬戶以兵萬人降秃滿迭兒走還遼東齊王月魯帖木兒元帥不花帖木兒等以兵圍上都倒剌沙等奉皇帝寶出降梁王王禪遁遼王脫脫為齊王所殺遂收上都諸王符印陝西軍至鞏縣黑石渡遂據虎牢我師皆潰諸伏悉為所獲河南行省告急戒有司修城壁嚴守衛陝西

軍奪武關萬戶楊允忠軍潰庚戌帝御興靈殿諸王大臣奉上皇帝寶倒剌沙從至京師下之獄御史臺臣言近者北兵奪紫荆關官軍潰走剽掠保定之民本路官與故平章張瑄子京武等率其民擊死官軍也先捏不俟奏聞輒擅殺官吏及瑄五子瑄父祖三世為國勲臣設使瑄不有罪瑄之妻女又何罪焉今既籍其家矣又以其女歸也先捏誠非國家待遇勲臣之意帝曰卿言是也命中書革正之中書省臣言凡有罪者既籍其家貲又沒其妻子非古者罪人不孥之意今後請勿殺人妻

子從之元帥也速答兒執湘寧王八剌失里送京師八剌失里及趙王馬禮罕諸王忽剌台承上都之命各起所部兵南侵冀寧還次馬邑至是被獲以其所俘男女千人各還其家詔毀顯宗室升順宗祔右穆第二室成宗祔右穆第三室武宗祔左昭第三室仁宗祔左昭第四室英宗祔右穆第四室加封漢闕羽為顯靈義勇武安英濟王遣使祠其廟詔諭御史臺今後監察御史廉訪司凡有刺舉並著其實無則勿妄以言廉訪司書吏當以職官教授吏負鄉貢進士相參用之 盜殺太尉不

花初不花乘國家多事率衆剽掠居庸以北皆為所擾至是盜入其家殺之有司論盜以死罪刑部議以為不花不道衆所聞知幸遇盜殺而有司隱其殘剝之罪獨以盜聞於法不當中書以聞帝嘉其議也先捏兵至武安也先帖木兒以軍降河東州縣聞之盡殺其所署官吏陝西兵進逼汴梁朝廷傳檄罷兵乃解去 監察御史撒里不花張士弘等言朝廷政務賞罰為先切罪既明天下斯定國家近年自鉄木迭兒竊位擅權假刑賞以遂其私綱紀始紊迨至泰定爵賞益濫比以兵興用人

甚急然而賞罰不可不嚴夫功之高下過之重輕皆係天下之公論願命有司務合公議明示黜陟功罪既明賞罰攸當則朝廷肅清紀綱振舉而天下治矣帝嘉納之鉄木哥兵入襄陽官吏皆遁去襄陽縣尹谷廷珪主簿張德獨不去西兵執使降不屈死之時僉樞密院使塔海擁兵南陽不救甲戌居秦定后雍吉刺氏于東安州荆王也速也不干遣使傳檄至襄陽鉄木哥引兵走庚辰遣使奉迎皇兄明宗皇帝於漠北壬午第三皇子寶寧更名太平訥命大司農買住保養於其家

癸未倒刺沙伏誅磔其尸於市王禪亦賜死馬某沙紐澤撒的迷失也先帖木兒皆棄市十一月四川省平章曩加台自稱鎮西王殺平章寬徹等稱兵燒絕棧道御史臺臣言也先捏將兵所至擅殺官吏俘略子女貨財詔刑部鞠之籍其家杖而竄之南寧命其妻歸父母家甲寅復遣中書待御史散迪內侍不顏禿古思奉迎皇兄於漠北加謚唐司徒顏真卿為貞烈文忠公令有司以時致祭十二月南臺御史言遼王脫脫自其祖父以來屢為叛逆蓋因所封地大物衆宜削王號處其

子孫遠方而析其元封分地詔中書與勳舊大臣
議之封西安王阿剌忒納失里為豫王賜南康
路為食邑加伯顏為太保知樞密院事

天曆二年己巳春正月庚申遣翰林丞旨不花失
里北迎皇兄行在所仍命大府太監沙剌班奉金
幣以往皇兄遣失里忽達孫刺刺至京師中書省
臣言近籍沒欽察家其子年十六請令與其母同
居仍請繼自今臣僚有罪籍沒者其妻有子他人不
得陳乞亦不得沒為官口從之 敕罷今歲柳林
田狩復鹽制每四百為引引為鈔三錠 中書省

臣言朝廷賞賚不宜濫及無功鷹鷂獅豹之食舊
支肉價二百餘錠今增至萬三千八百錠控鶴舊
止六百二十八戶今增二千四百戶請加揀汰制
可癸未遣宣靖王買奴往皇兄行在所丙戌皇兄
即皇帝位於和寧之北是為明宗二月辛卯帝御
大明殿冊命皇后雍吉刺氏 癸巳遣翰林侍講
學士曹元用祀祭于松關里 辛亥帝謂廷臣曰
撒迪還言大兄已即皇帝位凡二月二十一日以
前除官者速與制赦後凡銓選其詣行在以聞至
子命有司造行在帳殿三月辛酉遣燕鉄木兒奉

皇帝瑤子明宗行在所復命有司奉金千五百兩銀七千五百兩幣帛各四百匹詣行在所以備賜予帝命廷臣曰寶璽既北上繼自今國家政事其遣人聞于行在所癸亥命有司造乘輿服御北迎大駕癸卯明宗遣武寧王徹徹禿平章哈八兒禿來錫命立帝為皇太子五月己未遣翰林學士承旨何隣帖木兒北迎大駕命中書省臣擬注中書六部官奏于行在所丁丑帝發京師北迎明宗戊寅次于大口庚辰次香水國六月丁亥明宗遣近侍馬駒答台別不花至丁酉鉄木兒補花以旱乞避相

位有旨諭之曰皇帝遠居沙漠未能即至京師是以勉攝大位今亢陽為災皆為闕失所致汝其勉修厥職祇脩實政可以上答天變仍命馳奏于行在庚戌次上都六十里店陝西行臺御史孔思逸言人倫之中夫婦為重比見內外大臣得罪就刑者其妻妾即斷付他人似與朝廷旌表貞節之旨不侔夫亡終制之令相反况以失節之婦配有功之人又與前賢所謂取失節者以配身是已失節之意不同今後凡負國之臣籍沒奴婢財產不必罪其妻子當典刑者則孥戮之不必斷付他人

庶使婦人均得守節請著為令賜鳳翔府岐陽書院額祀周文憲王仍命設學官春秋釋奠如孔子廟儀明宗遣吏部尚書別兒怯不花還京師命中書集老臣議救荒之策時陝西河東燕南河北河南諸路流民十數萬自嵩汝至淮南死亡相藉命所在州縣官以便宜賑之秋七月丙辰朔日食丁巳次上都二十里店春夏旱至六月壬子雨連日是月戊午乃止遂成水災己未更定遷徙法凡應徙者驗所居遠近移之千里在道遇赦皆得放還如不悛再犯徙之本省不毛之地十年無過則量

移之所遷人死妻子聽歸土著著為令 八月乙酉朔明宗次于王忽察都丙戌入帝見明宗宴帝及諸王大臣于行殿庚寅明宗崩帝入臨哭甚哀燕鐵木兒以明宗后之命奉皇帝珪授于帝遂還癸巳至上都監察御史徐夔言天下不可一日無君神器不可一時而曠先皇帝奄棄臣庶已踰數日伏望早正宸極以安億兆之心實宗社無疆之福己亥帝復即位于上都大赦天下以伯顏為中書左丞相依前太保中書省臣言祖宗故事即位之初必思資諸王百官比曰兵經費不足請如武宗之

制凡金銀五錠以上減三之五錠以下全畀之又以七分
為率其二分準時值給鈔制可遣欽察台先還京師經
理正務燕鐵木兒留上都監給息資金幣以仁宗英宗潛
邸宿衛士二百人還大都備直宿以馬禮兒台為上都留
守馬禮兒台前為陝西行臺御史坐塗毀詔書得罪
罪至是以其兄伯顏有功故特官之己酉車駕發
上都加封大都城隍神為護國保寧王丁卯車駕
至大都改潛邸所幸諸路名建康曰集慶江陵曰
中興瓊州曰乾寧潭州曰天臨敕翰林國史院同
奎章閣學士輯本朝典故準唐宋會要著為經世

大典敕使者頒詔赦率日行三百餘里既受命逗
留三日及所至飲宴稽期者罪之取賂者以枉法
論史惟良上疏言今天下郡邑被害者衆國家經
費若此之繁帑藏空虛生民凋瘵此正更新百廢
之時宜遵世祖成憲汰冗濫蠶食之人罷土木不
急之後事有不便者咸釐正之如此則天灾可弭
禎祥可致不然將恐因循苟且其弊弥深治亂之
由自此而分矣帝嘉納之丙子也先捏伏誅 癸
未建顏子廟于曲阜所居陋巷冬十月辛卯燕鐵
木兒率群臣請上尊號不許 中書省臣言舊制

朝官以三十月為一考外任則三年為滿比年朝官不久於其職或數月即遷於典制不類且治跡無從考驗請如舊制為宜敕除風憲官外其餘朝官不許二十月內遷調丙申中書省臣奏臣等謹集樞密院御史臺翰林集賢院奎章閣太常禮儀院禮部諸臣僚議上大行皇帝尊謚曰翼獻景孝皇帝廟號明宗國言謚號曰護都篤皇帝是日奉玉冊玉寶于太廟如常儀命江西湖廣分漕米四十萬石以紓江浙民力 己亥加封天妃為護國庇民廣濟福惠明著天妃賜廟額曰靈慈遣使致

祭 徵朶朶王士熙等十二人于貶所放還鄉里十二月乙未改封前鎮南王帖木兒不花為宣讓王初鎮南王脫不花卒子孛羅不花幼命帖木兒不花襲爵孛羅不花既長帖木兒不花請以王爵歸之乃特封宣讓王以示褒寵 帝謂廷臣曰皇姑魯國大長公主早寡守節不從諸叔繼尚鞠育遺孤其子襲王爵女配子一人朕思庶民若是者猶當旌表况懿親乎可命趙世延虞集等議封號以聞 是歲會賦入之數金三百二十七錠銀千一百六十九錠鈔九百二十九萬七千八百錠幣

帛四十萬七千五百匹絲八十八萬四千四百五十
十觔綿七萬六百四十五觔糧千九十六萬五十
三石

至順元年庚午春正月命趙世延趙世安領纂修
經世大典事二月以修經世大典久無成功專命
奎章閣阿憐帖木兒忽都魯都兒迷失等譯國言
所紀典章為漢語纂修則趙世延虞集等而燕鐵
木兒監修如國史例奎章閣學士忽都魯都兒迷
失及撒迪虞集辭職帝諭之曰昔我祖宗睿知聰
明其於致理之道自然生知朕以統緒所傳實在

眇躬夙夜憂懼自惟蚤歲跋涉艱阻視我祖宗既
乏生知之明於國家治休豈能周知故立奎章閣
置學士負日以祖宗明訓古昔治亂得失陳說於
前使朕樂於聽聞卿等其推所學以稱朕意其勿
復辭 加封秦蜀郡太守李冰為聖德廣裕英惠
王其子二郎神為英烈昭惠靈顯仁祐王雲南諸
王禿堅及萬戶伯忽阿木法朝等叛攻陷重慶路
殺廉訪司官執左丞忻都等禿堅自称雲南王以
百忽為丞相阿木忽刺忽等為平章等官立城柵
焚倉庫以拒命乙巳封明宗子赤璘質班為廊王

丁未以伯顏知樞密院事依前太保錄軍國重事
詔諭中書曰昔在世祖以宰相一人總領庶務故
治出於一政有所統今燕鐵木兒為右丞相伯顏知
樞密院事左丞相其勿復置 三月戊子封皇子阿
剌忒納答剌為燕王立宮相府總其府事以燕鐵
木兒領之 廷試進士賜篤列圖王文煒等九十
七人及第出身有差命彰德路歲祭姜里周文王
祠 己巳議明宗升祔序于英宗之上視順宗成
宗廟遷之例 壬申奉玉册玉瑤祔明宗神主于
太廟 五月戊午帝御大明殿燕鐵木兒率文武

百官上尊號曰欽天祝聖至德成功大文孝皇帝
是日改元至順詔天下戊辰車駕發大都次大口
己巳次龍虎臺丙戌至上都 烏蒙土官錄余殺
烏撒宣慰司官吏降於伯忽羅羅斯諸蠻俱叛與
伯忽相應平章帖木兒不花為其所害四川行省
兵討雲南至雪山山峽遇羅羅斯軍擊敗之丙申立
行樞密院以徹里帖木兒知行院事探馬赤教化
為同知副使發朶甘思朶思麻及鞏昌等處軍萬
三千人討雲南徹里帖木兒同鎮西王搠思班等
由四川教化從豫王阿剌忒納失里由八番公道

進軍羅羅斯土官撒加伯合烏蒙蠻兵攻建昌雲南右丞躍里帖木兒拒之斬首四百級四川軍亦敗撒加伯于蘆古驛秋七月庚午中書省臣言近歲帑廩空虛其費有五曰賞賜曰作佛事曰創置衙門曰濫冒吏請曰續增衛士鷹坊請與樞密院御史臺各怯薛官同加汰減從之大駕將還敕上都兵馬司官二員率兵士由偏嶺至明安巡邏以防盜賊閏十月丁酉駕發上都征戍雲南軍士二人逃歸捕獲法當死行樞密院以聞帝曰如臨戰陣而逃死宜也非接陣而逃輒當以死何視人

命之易邪其杖而流之戊申加封孔子父齊國公叔梁紇為啓聖王母魯國大夫人顏氏為啓聖王夫人顏子究國復聖公曾子邾國宗聖公子思沂國述聖公孟軻鄒國亞聖公河南伯程顥豫國公伊陽伯程頤洛國公羅羅斯土官撒加伯及阿恆土官阿刺里州土官阿益以兵八千撤毀棧道遣把事曹通潛結西番欲搃大渡河進寇建昌四川行省調堠門安撫司軍七百人成都等處諸屯兵千人令萬戶周戡統領直抵羅羅斯界以控扼西番及諸蠻部又遣萬戶替定遠以軍五千同

印部知州馬伯所部蠻兵會周戡等從便進討躍里帖木兒以兵屯建昌執曹通斬之八月大駕至京師御史臺臣請立燕王為皇太子帝曰朕子尚幼非裕宗為燕王時比俟燕帖木兒至議之十月壬子諸王大臣復請帝曰卿等所言誠是但燕王尚幼恐其識慮未弘不克負荷徐議之未晚也戊午帝致齋於大明殿己未遣亞獻官燕鐵木兒終獻官貼穆爾補化率諸執事者告廟請以太祖皇帝配享南郊庚申出次郊宮辛酉帝服大裘袞冕祀昊天上帝于南郊以太祖皇帝配禮成大駕還宮甲

戌敕累朝宮外官署凡文移無得稱皇后止稱某位下娘子其委用官屬並由中書擬聞賜伯夷叔齊廟額曰聖清每歲春秋祀以少牢雲南禿堅伯忽等執愈猖獗烏撒祿余亦乘勢連約烏蒙東川茫部諸蠻欲攻順元遣使趣四川雲南兵進討四川平章塔出引兵由永寧左丞李羅引兵由青山茫部並進陳兵周流驛及祿余等戰殺蠻兵三百餘人祿余衆潰即棄其關隘以通順元諸軍羅羅斯撒加伯烏撒阿谷等合諸蠻萬五千人攻建昌躍里帖木兒等引兵追戰于木托山下敗之

斬首五百餘級。以董仲舒從祀孔子廟，位列七十二子之下。國子生積分及等者，省臺集賢院奎章閣官同考試。中式者以等第試官，不中者復入學肄業。十二月辛亥，立燕王阿剌忒納答剌為皇太子。監察御史言：昔裕宗由燕邸而正儲位，世祖擇耆舊老臣如王顯、姚燧、蕭輦等為之師保賓客。今皇太子仁孝聰睿，出自天性，誠宜慎選德望老成學行純正耆俾之輔導於左右，以弘養正之功。實宗社生民之福也。帝嘉納其言。戊午，以十月郊祀禮成，大赦天下。

二年辛未春正月，行樞密臣言：權仁德府官曲木糾集義兵以討雲南，首敗伯忽賊兵於馬龍州。殺伯忽弟拜延，又戰于馬金山，獲伯忽及其弟伯顏。察兒其黨拜不花、卜顏帖木兒等十餘人，誅之餘兵皆潰。獨祿余猶據金沙江，有旨趣進兵討之。中書省臣言：四川省臣塔出脫帖木兒等討雲南，領兵至烏撒，周泥驛祿余阿奴答等賊兵萬餘自山後間道潛出，塔出脫帖木兒等進擊，屢敗之。六月十七，戰賊大敗，潰去。詔遣使以銀幣往勞賞之。辛卯，皇太子阿剌忒納答剌卒。鎮西武靖王搠

思班豫王阿刺忒納失里等討雲南以去年十一月師次羅羅斯期躍里帖木兒等同進兵躍里帖木兒倍道兼進棄金沙江十二月大兵與阿禾軍相值戰敗之阿禾竄走大兵直趨中慶遇賊兵於安寧州再戰又敗之擒阿禾斬于軍前大兵將抵中慶賊兵七千猶拒戰于伽橋古壁口兵交躍里帖木兒左頰中流矢洞耳後拔矢復戰大捷遂復行省治諸軍皆會駐于城中分兵追捕殘賊於嵩明州樞密院臣以捷聞詔總兵官量緩急從宜區處二月樞密臣言撒里帖木兒孛羅以正月戊寅敗

烏撒蠻兵射中祿餘降其民烏蒙東川夷獠俱欵附鎮西武靖王軍駐中慶復行省事又言徵江路蠻官郡容報賊古刺忽及禿堅之弟必刺都迷失等偽降於豫王而反圖之至易龍驛古刺忽等掩襲官軍四川平章塔出頓兵不進謀知禿堅方修城堡布兵拒守無出降意詔速進兵討之 創建五福太一宮于京城乾隅敕每歲四祭五福太一星 三月司徒香山言陶弘景胡笳曲有負宸飛天曆終是甲辰君之語今陛下生年紀號正與之合此實受命之符乞錄付史館頒告中外詔令翰

林集賢奎章禮部諸臣議之翰林臣議以謂唐開元間太子賓客薛讓進武后鼎銘云上玄降鑒方連隆基為玄宗受命之符姚崇表賀請宣示史官頒告中外而宋儒司馬光斥其采偶就之文以為符端乃小臣之諂而宰相實之是侮其君也今弘景之曲雖於生年紀號若偶合者然陛下應天順人紹隆正統于今四年溥海內外罔不歸心固無待於旁引曲說以為符命從其所言恐妄啓讖緯之端非所以定民志也事遂寢 豫王阿剌忒納失里鎮西武靖王搠思班擒雲南賊首也不干等

及諸將校悉斬之磔其尸以徇雲南平各遣使來報捷夏四月搠思班言蒙古軍及哈剌章羅羅斯諸種人叛者或誅或降雖已略定其餘逃竄山谷不能必其無反側請留荆王也速也不干及諸王鎮南等各領所部屯駐一二歲以示威重從之五月乙未奎章閣學士院纂修皇朝經世大典成上之 丙申駕幸上都監察御史韓元善言歷代國學皆盛獨本朝國學生僅四百員又分辦蒙古色目漢人之額請凡蒙古色目漢人不限員額皆得入學不報秋七月藝文少監歐陽玄言先聖五十

四世孫襲封衍聖公爵最五等秩登五品而用四品銅印於爵秩不類詔鑄從三品銀印給之以雲南平惟祿余惧罪竄伏降詔曲赦之封伯顏為浚寧王仍前太保知樞密院事八月朔日食車駕還大都御史臺劾奏四川叅政馬鎔發糧餉雲南軍中道輒還預借俸鈔以娶妾又詬罵平章汪壽昌比雖蒙宥難任宰輔帝曰綱常之理尊卑之分情無所知其何以居上而臨下亟罷之九月祿余寇順元路雲南行省遣都事那海奉詔往諭祿余及授以叅政制命祿余推不受蒙古都元帥怯

列引兵擊阿禾餘黨於靖江海中山為雲梯登山破其柵殺賊五百餘人禿堅之弟必刺都古豕失舉家赴海死十一月朔日食雲南行省言亦乞不薛之地所牧國馬歲給鹽以每月上寅日啖之則馬俱無病比因伯忽叛亂雲南鹽不可到馬多病死詔令四川行省以鹽給之癸未詔養燕鉄木兒子塔刺海為子賜居第及所籍李彥通貲產十二月河北道廉訪使僧家奴言自古求忠臣必於孝子之門令官於朝者十年不省親者有之非無思親之心也由朝廷無給假省親之制而有擅

離官次之禁古律諸職官父母在三百里於三年聽一給定省假二十日無父母者五年聽一給拜墓假十日以此推之父母在三百里以至萬里宜計道里遠近定立假期其應省親匿而不省親者坐以罪若詐冒假期窺避以掩其罪與誑奔役者同科御史臺臣以聞命中書省禮部刑部及翰林集賢奎章閣議之

三年壬申春正月封孔子妻鄆國夫人并官氏為大成至聖文宣王夫人丙戌印造歲額鈔本至元鈔九十九萬六千鈔中統鈔四千鈔四川行省

言去年九月左丞帖木兒不花與祿余戰被傷賊遂侵境乞調重慶叙州兵往救之順元宣慰亦言賊列行營為十六所乞調兵分道備禦一月雲南行省言會通州土官阿賽及河西阿勒等與羅羅賊兵寇會川之下龍村又祿余引兵與花部合寇羅羅斯截大渡河金沙江以攻東川會通等州臣等請奉先所降詔書招諭之不奉命則從宜進討制可祿余言于四川行省自父祖世為烏撒土官宣慰使佩虎符素無異心曩為伯忽誘脅比聞朝廷招諭而今限期已過乞再降詔赦即率四路土

官出降仍乞改屬四川省隸永寧路冀得休息四川行省以聞詔諸大臣議之 邛州有二井舊名曰金鳳芳池天曆初地震鹽水湧溢州民侯坤願作什噐煮鹽為輸課於官詔四川轉運鹽司主之 三月癸巳皇子古剌答納更名燕帖古思 夏四月戊申太寧路地震 五月右丞撒迪請備錄皇上登極以來固讓大兄往復奏答其餘訓敕辭命及燕鐵木兒等宣力效忠之蹟命朶朶來續為蒙古脫卜赤顏書置之奎章閣從之戊寅京師地震有聲 太常博士王瓚言各處請加封神廟濫及

淫祠按禮經以勞定國以死勤事能禦大灾能捍大患則祀之其非祀典之神今後勿許制可丁酉白虹並日出長天竟 追封顏子父無繇為祀國公謚文裕母齊姜氏祀國夫人謚端獻妻宋戴氏充國夫人謚貞素 六月詔錄用朶朶王士熙脫脫等子孫監察御史陳思謙言內外非文武官全才出處繫天下安危能極金革之難者勿許奪情

詔給征雲南軍流離至陝西者四百六

十七戶糧三月遣復其居 八月乙巳天狗星墜東北己酉隴西地震是日帝崩壽二十有九在位

五年癸丑靈駕發引葬起輦谷從諸帝陵元統二年正月己酉太師右丞相伯顏率文武百官議上尊謚曰聖明元皇帝廟號文宗國言為札牙篤皇帝後至元六年六月以帝謀不軌使明宗飲恨而崩詔除其廟主放燕鐵古思於高麗而卒明宗之子郕王立是為寧宗皇帝寧宗皇帝名懿璘質班明宗次子也母乃蠻氏初武宗有子二人長明宗次文宗延祐中明宗封周王出居沙漠泰定之際正統遂偏天曆元年文宗入紹大統內難既平即遣使奉皇帝璽綬北迎明宗明宗崩文宗復即皇

帝位明宗有子二人長妥懽貼睦爾次即帝也至順元年二月封帝為郕王二年八月文宗崩于上都皇后承文宗意傳位於明宗之子時妥懽貼睦爾出居靜江帝以文宗眷愛之篤留京師太師太平王右丞相燕鐵木兒請立帝以繼大統於是遣使徵諸王會京師中書百司政務咸啓中宮取進止十月庚子帝即位于大明殿大赦天下戊申賞賚諸王金幣其數如文宗即位之制乙卯以即位告祭南郊己未告祭太廟庚申告祭社稷十一月戊申尊皇后曰皇太后壬辰帝崩年七歲甲午葬

起輦谷後謚曰冲聖嗣孝皇帝廟號寧宗皇帝立

是為順皇帝

養恭王金

出

其

年

王

古

世

篆書

印

